



Inatsisartunut ilaasortaq  
Randi Vestergaard Evaldsen  
Demokraatit

## **Meeqqat kinguaassiuutitigut nappaateqartarnerat pillugu § 37 naapertorlugu apeqquutip akineqarnera**

Aallarniutigalugu qutsavigissavakkit Inatsisartut suleriusaanni § 37 naapertorlugu meeqqat kinguaassiuutitigut nappaateqartarnerat pillugu apeqqutit akisinnaagakku.

Apeqqutitit ataani akissavakka.

### **1. Suliniutit suut Naalakkersuisut aallartinniarpaat meeqqat akornanni nappaatipalaaq peerutinniarlugu?**

Peqqissutsimut Naalakkersuisoqarfiup NGO SexInuk kiisalu Nunatsinni Nakorsaaneqarfik suleqatigalugit piffissami 2015 – 2016 paasititsiniaaneq aallartippaa. Paasititsiniaanermi siunertarineqarpoq atoqatigiinnikkut nappaatinut tuniluuttartunut illersornissap immikkut aallunneqarnissaa. Taamaattumik oqaasinnaaq ”Imminut paarigit, usuup puua atoruk” atorneqarpoq. Ataasiarluni aningaasaliinikkut immikkut suliniarneq taanna ingerlanneqarpoq.

Paasititsiniaanermi tamatumani misilittakkat atoqatigiinnikkut nappaatit tuniluuttut akiorniarlugit ataatsimut suliniarnermut nuna tamakkerlugu periusissiamut ilanngunniarlugit Peqqinnissaqarfik suliniuteqarpoq.

Meeqqanik atoqateqarneq pinerluttuliorneruvoq atuutinngilluinnassallunilu. Tamanna atuukkunnaarsissagutsigu siammasinnerusumik iliuuseqartariaqarpugut, tamatumani sakkussat allat – aamma susassaqarfiit allat akuliutitinnissaat – pisariaqartippavut. Tamatumani isumaginnittoqarfik, atuarfiit meeqqerivillu tamarmik ilanngutitineqassapput.

Nunatsinni meeqqat kinguaassiuutitigut atonerlunneqartartut alianarluinnartumik amerlassusaasa appartinnissaannik siunertaqartunik Isumaginninnermut Naalakkersuisoqarfik assigiinngitsunik suliniuteqarpoq.

14-09-2017  
Sags nr. 2017 - 12534  
Akt nr. 5661810

Postboks 1160  
Tlf: 34 50 00  
Fax: 34 55 05  
3900 Nuuk  
Email: pn@nanoq.gl  
www.naalakkersuisut.gl

Qitiusumik Siunnersuisarfimmi Saaffik meeqqanik kinguaassiuutitigut atonerlunneqarsimasunik aalajangersimaqqissaartumik sullissivoq, tamatumalu saniatigut nunatsinni ilaqtariinnut sullissivinni sulisut meeqqanik innarliinerit pitsaaliornissaannut suliarinissaannullu piareersimanerulerniassammata Saaffiup ilinniartittarpai.

Tamatuma saniatigut inersimasut meeraanerminni kinguaassiuutitigut atonerlugaasimanermik kingunerisaanik atugarliuuteqartut sullinniarlugit Angalaqatigiittartut 2013-imilli inuit 500-nit amerlanerusut nunatsinni assigiinngitsuneersut katsorsarsimavaat. Inersimasut meeraanerminni kinguaassiuutitigut atonerlunneqarsimasut inuunerminni atugaasa pitsaanerulersinnerisa saniatigut Angalaqatigiittartut siunertarivaat pingaarutilik sullitat meeraasa tamakkununnga assingusunik kinguaassiuutitigut atonerlunneqarnissaasa allatigullu sumiginnaaganissaasa aarlerinassusaata appartinnissaa.

**2. Meeqqat arfineq-marluk qulit inorlugit ukiullit 2016-mi paasineqarpoq nappaatipalaartut. Oqartussaasut ullumikkut sunik iliuuseqarpat paasiniallugu, qanoq ilillutik meeqqat taakku nappaatipalaamik tunillanneqarsimanersut? Qanoq sukkatigisumik qisuariartoqarpa? Aamma pinerlussimasut qassit nassaarineqarpat pineqaatissinneqarlutillu?**

Peqqinnissaqarfiup peqqissutsikkut suliallit napparsimasunik – aamma meeqqanik – atoqatigiinnikkut nappaatinik tunillanneqarsimasunik qanoq sullissisarnissaannik ilitsersuusiuupai. Siusissukkut Iliuuseqarneq, Dronningip Ingridip Napparsimmavissuani sulisut aamma nunap immikkoortuini peqqissaaviit suleqatigalugit kiisalu Nunatsinni Nakorsaaneqarfiup siunnersuineratigut ilitsersuutit taakku suliarineqarput. Nalunaartussaaneermut pisussaaneq ilitsersuutini ilaatigut pingaartinneqarpoq. Peqqissutsimut Naalakkersuisoqarfiup meeqqanik sullissisut meeqqanik atonerluineq kiisalu nalunaartussaaneermut pisussaaffik pillugu ilisimatissavai. Tassunga atatillugu peqqinnissaqarfimmi sulisut politiinut nalunaartussaataaneermut immikkut pisussaaffeqartut erseqqissarneqassaaq.

Peqqinnissaqarfiup paasippagu meeraq 15-it inorlugit ukiulik atoqatigiinnikkut nappaamik tunillanneqarsimasooq sulisut meeqqap kommunimi najugaqarfigisaani isumaginninnermut oqartussaasut nalunaarfigissavaat. Tamatuma kingorna kommunip akisussaaffigissavaa meeqqap angerlarsimaffimmi atugaasa malittarinissaat kiisalu suliame suli annerusumik misissuisoqassasoq pinerluttoqarsimaneranillu paasiniaasoqassasoq kissaatigineqarpat suliap politiinut nalunaarutigineqarnissaa.

Apeqqummut pinerlussimasut qassit nassaarinqarsimanersut qassillu pineqaatissinneqarsimanersut tunngatillugu akisinnaangilara eqqartuussisoqarneq Naalakkersuisut ataaniingimmat.

### **3. Suliniutit suut Naalakkersuisut eqqarsaatigaat aallartinniarlugit inuiaqatigiinni naliginnaasumik nappaatipalaartut ikilisinniarlugit?**

Inuusamik paarsaqartarnermik suliniut pitsaaliuinermit periutsit atorreqartut ilagaat. Matumani peqqinnissaqarfiup sulisuisa inuusuttut peqqinnartumik atoqatigiittarneq illersuuteqaranilu atoqateqarnerup, ilaatigut kinguaassiuutitigut nappaateqalersitsinnaasup, kingunerisai pillugit ilitersortarlugillu oqaloqatigisarpaat. Nuna tamakkerlugu peqqinnissakkut periusissiaq 2018-2022 pineqartoq aallutarineqarnerussaaq aamma atuarfinni ilinniartitsineq pillugu susassaqarfiit akimorlugit suleqatigiinnissaq sulissutigineqassalluni.

Tamatuma saniatigut peqqinnissaqarfiup sulissutigaa qallunaatut app-ip "Ung Sexguide"-ip kalaallisut app-inngortinneqarnissaa, tamatumani assit oqaaseqatigiillu atorlugit inuusuttut atoqatigiinneq, kinguaassiuutitigut nappaatit paasitinneqartarlutillu qaninniaqatigiinneq, asaqatiginneq tatitussuserlu pillugit ilitersorneqartarput. Naatsorsuutigineqarpoq app-eq aggustimi inerneqassasoq, tamatuma kingorna nuna tamakkerlugu paasititsiniaanikkut inuusamillu paarsaqartarnermik suliniutikkut siammarterneqassalluni.

### **4. Pineqartumut tunngasunik allanik Naalakkersuisut paasissutissiisinnaappat?**

Peqqissutsimut Pitsaaliuinernullu Aqutsisoqarfiup aamma Nunatsinni Nakorsaaneqarfiup siusinnerusukkut suliniutini, soorlu SexInuk-imi il.il., misilittakkat misissorpaat paasiniarlugu atoqatigiinnikkut nappaatit tuniluuttut pitsaaliornissaannut nuna tamakkerlugu periusissiami nutaami atorreqarsinnaanersut.

Kingullertut eqqaaneqarsinnaavoq Isumaginninnermut Naalakkersuisoqarfiup suliniutit allat meeqqanik kinguaassiuutitigut atornerluinermit pitsaaliuisussat taamaalillunilu meeqqat akornanni kinguaassiuutitigut nappaatinik atuukkunnaarsitsisussat aallartisarnissaat sulissutigimmagu. Assersuutigalugu naalakkersuisoqarfiup kinguaassiuutitigut kanngunarsaasunik katsorsaaniissap aallartisarnissaa sulissutigaa. Maannamut kanngunarsaasunik katsorsaaneq aallunneqarsimanngilaq, kisianni kinguaassiuutitigut atornerluinerit amerlassusaat ikilissagutsigit aamma kanngunarsaasut aalluttariaqarpavut ajortoq utikattoq unitsikkumallugu. Misissueqqissaarnermit ersersinneqarpoq kanngunarsaasunik katsorsaaniikkut

atornerluisoqarnissaanik aarlerinarteq – kinguaassiuutitigut atornerluisunut pineqaatissinneqarsimasunut aamma kanngunarsaasinnaasunut meeqqanik atoqateqarnissamik eqqarsaateqartartunut takorluisartunullu tunngatillugu – annertuumik appartinneqartarteq. Kanngunarsaasunik katsorsaaneq taamaalilluni siunissami meeqqanik atornerluinermik pitsaaliuinermi suliniutitut pingaarutilittut isigineqarsinnaavoq.

Inussiarnersumik inuulluaqqusillunga

  
Agathe Fontain